



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

Tir Yimyim

tiryimyim@aolima

tir yimyim

TAPAK 5

Sorkari tangar nem vaccine agütsür saka India nungbo anünger: Sonia

Teen Missions International tentetsang, Robert Bland süogo



VOL. XVIII NO. 176 (ADOK 176) DIMAPUR

AMUNGNÜ (SUNDAY)

RONGCHII (APRIL) 11, 2021

₹ 5.00

COVID-19 Nagaland: Nisung 12 dak putet

Kohima, April 10 (TYO): Honibarnü Nagaland nung nisung 12 dak COVID-19 aliba putet aser parnok züngsema nisung 12,400 kümogo.

"Tanü nisung 12 dak COVID-19 aliba putet. Parnokji Dimapur nung nisung 7, Kohima nung 4 aser Mokochung nung 1 lir. Külén, Kohima nung nisung ana taneptsü angu" ta Health & Family Welfare Minister, S Pangnyu Phom-i metetdaksü.

Nisung 12,400 rongnungi 11,990 taneptsü nguogo aser tang nisung 157 anepaludar, ta paisa ashi.

Nagaland nung COVID-19 nungi taneptsü angur 96.67% lir. Tang tashi nung COVID-19 puteter nisung 91 asü saka parnok 10 bo tanga timtem ajanga asü. Külén, nisung 162 tashi tanga state temi ogo, ta Health & Family Welfare Director, Dr Denis Hangsing-i ashi.

Tang anepalurtem rongnung nisung asem oxygen agia anepaludar, 4 dak shirangba yimya terara lir aser tanüngba

nisung 150 dakbo shirangba yimya kecha mali, ta paisa ashi.

"Nagaland nung COVID-19 alitsü akok ta temolung melemi bilemba sample 1,38,300 tendangogo. RT-PCR ajanga sample 75,788, TrueNat ajanga 37,598 aser Rapid Antigen Test ajanga 24,914 tendang" ta Dr Hangsing-isa metetdaksü.

NAGALAND NUNG NISUNG 80,942-I VACCINE AGIOGO:

Honibar tashi nung Nagaland nung nisung 80,942 nem covishield indang dose 1,09,286 agütsüogo, ta State Immunization Officer Dr Ritu Thurr-i ashi.

Vaccine agirtem rongnung frontline workers 38,940, healthcare workers 12,535, teintet rogo 17,334 aser arishi küm 45 ser temapur 12,133 lir, ta paisa metetdaksü.

Frontline workers 18,437, healthcare workers 8,728, teintet rogo 755 aser arishi küm 45 ser temapur 406 tashi vaccine indang dose anaprong agiogo, ta Dr hurr-isa ashi.

Nagaland police ajak Covid-19 vaccine agitsü

Dimapur, April 10 (TYO): Nagaland police nung züngsem ajak Covid-19 vaccine agitsü atema ozüng agütsüogo.

Honibarnü Nagaland DGP office ajanga unit commander ajak dang police ajak vaccine agitsü atema tetuyuba agütsü.

"Vaccine agiba sülen nü dak Covid-19 virus mena nunga nü indang immune system-i iba den rarattetsü. Iba jagi onoki police ajaki vaccine agitsü rongshir" ta Superintendent of Police (Crime)

& PRO, PHQ-i sangdong nung metetdaksüogo.

India nung COVID-19 wara tanabuba ajanga Northeast state tem nung mekongshi lir saka Union health ministry-i state tem dang Covid-19 inyakyim ajak beshitsü atema tetuyuba agütsüogo.

Northeast state 8 nung Covid-19 azüoktsü atema Ministry of Development for North Eastern Region (DoNER) minister-i Rs 250 crore lemkütsüogo.

CBSE-i class 10 & 12 Board exam agitsü

New Delhi, April 10 (Agencies): Central Board of Secondary Education (CBSE)-i Board Exams 2021 mathitsü ta osang metetdaksüogo.

May 4, 2021 nungi class 10 & 12 board exams agitsü ta CBSE-i tanü ashi.

Linük nung coronavirus kanga putetba ajanga kaketshirtemi sorkar dang Board exams 2021 thinentsü atema ayongzüka arur.

Hokolbarnü CBSE Board Exam 2021 athitsü atema online petition ka nung signatures 1, 00,000 ajangogo.

"Ni education ministry dang iba onük atema bilemdangtsü aser taküm agitsü aliba tatidang ajak athitsü ayongzüker. Ajak dang temabaji, kaketshirtemi tatidang nung tekolok anibelemtsü aser takok tajung mengutetra, telemtetba tamajungtem agitsü akok. Anungji süoki ia bilema inyaksüla" ta online petition nung shia lir.

kümküka ayutsü atema teinyaktsü ajak inyaktsü ta CBSE aser Council for the Indian School Certificate Examinations (CISCE) külem sangdong ka ajanga online petition nem telangzüba agütsüogo.

"Covid inyakyim nung linük kübok exam centre 40-50% timba kümogo. Iba ya tatidang mapang nisung o nisung tsüngda tepila ayutsü atema lir. Covid-19 wara liaka CBSE-i board exams 2021 tiptema agitsü atema renema lir" ta CBSE ketdangsur kati ashi.

Hokolbarnü Congress general secretary Priyanka Gandhi Vadra-i kaketshirtemi pusema takhangba agütsüogo.

"CBSE-i kaketshirtemi tashiyim agi Board examinations agütsüaktsübaji tebilemba khuret mabenba inyakyim ka lir. Linük nung COVID-19 tensa nung ajemdaker Board examinations athitsüla mesüra tanga mapang ka nung agitsü atema anogo melentsüla," ta Priyanka-i metetdaksü.

Postal Department dang yimtsüngtem nung banking services tenzüksü ayongzüker



Commissioner & Secretary, K Kevichusa, PMG NE-II Region, Dimapur, Som Kamei aser sempet angurtem noksa nung angur.

Kohima, April 10 (TYO): Nagaland nung Postal Department-i yimtsüngtem nung banking services tenzüksü atema tanü Nagaland Commissioner & Secretary, Industries & Commerce Department, K Kevichusa-i ayongzüker.

Honibarnü Hotel Japfu nung North East-II Region indang sentong ka agidang pai iba tayongzüka ya agütsü.

North East-II Region nung Manipur aser Nagaland dena lir aser Postmaster General (PMG) NE-II Region, Dimapur Office ajanga iba sentong ayongzüka agi.

"Yaküm COVID-19 wara agi timtemdang tanga courier services shibang saka postal department-ibo parcel services meshibangi inyakogo. Iba atema postal services nung staff ajak nem tenüngsang agütsür" ta Kevichusa-i ashi.

Postal department-i Nagaland kübok yimtsüngtem nunga postal banking services tenzüksüla aser India Post Payment Banks (IPPB) amala teyari balala agütsüla, ta pai ayongzüker.

"Indian Postal Services (IPoS) nungi asü nung postal services aser postal department nung technology kanga renlokba ajitetet, anungji Nagaland nunga digital services atema renemtsüla" ta Kevichusa-isa ashi.

Akokba tashi pai postal department nungittsü aser sorkar danga teyari meshitsü ta paisa shisem.

"COVID-19 wara mapang mapa inyakeremi bendanga agüja inyakba atema tenüngsang agütsür" ta PMG NE-II Region, Dimapur Som Kamei-i metetdaksü.

Sempet balala angurtem:

Best Sub-division Postmaster (SPM) - S. Thangboi Haokip

SPM Mon MDG

Best Postman: K. Hekheangla, Postwoman New Sectt Complex; Sheangpong Konyak, Postman Mon MDG and Shivji Prasad, Postman, Imphal HQ

Best Branch Postmaster: Ng. Sanjoy Singh, BPM Kanglatongbi and M. Khentsumew Yimchunger, BPM Pungro BO under Kiphire

Highest IPPB Account opening: Taib Hussain, ABPM Patkai Christian College BO under Chumukedima and M. Chajinka, ABPM, Waikhong BO under Kakching SO Manipur.

Highest Aadhar enabled Payment System: Linpa Kom, BPM, Sagang BO under Moirang SO Manipur and Kevigo Sema, ABPM, Vihokhu BO under Dimapur Bazar SO, Nagaland.

Best Sub-Division Inspector: 1st - Parma Mahato and AngamoKadamba Singh.

Nagaland CS-i NIDA dang lungkak maittsü mepishir

Dimapur, April 10 (TYO): NIDA-i April 12, 2021 nungi 'mass casual leave' agitsü telemtetba agiba atema Nagaland Chief Secretary-i anir ketdangsurtemi NIDA lennirtem den senden ka menogo.

April 7, 2021 nü Cabinet senden nung iba ken o asüngdangteptsü atema benogo. December 2020 nung iba ken o adokba sülen nungi sorkari iba onük atema bilemer aser Cabinet-i anaben tashi benoka jembiogo, ta Chief Secretary, J.

Alam IAS-i NIDA lennirtem dang ashi.

Linük nung küm ka dak tema Covid wara agi timtema aruogo aser ano tang wara tanabenbuba tenzüker. Anungji Covid vaccine agütsüba, tendangba aser anepaluba nung meinprong kecha melii inyaksüla, ta Chief Secretary-isa ashi.

Nagaland nung Disaster Management Act, 2005 ozüng magien lir aser Nagaland Essential Services (Maintenance Act, 1978) kübok health services

ya essential service ka ama züngoka lir. Anungji NIDA-i iba mapa inyaktsü ozüngi memelar aser talisa iba ama tensa ka nung health services nung tetsükdaksü agütsüba ajanga public akoksatsü, ta paisa ashi.

NIDA-i akhangba onüktem atema jembiteptsü aser sorkari iba ya ajaki haihaura kaa angatetteptsü. Anungji tensa dak rangloker NIDA-i lungkak aittsü lemtetba meyipa agitsü mepishir, ta Nagaland CS J. Alam IAS-isa metetdaksü.

Assam polling station 4 nung re-poll asütsü

Guwahati, April 10 (Agencies): Assam Election Commission-i assembly constituency asem kübok polling station 4 nung re-poll asütsü tetuyuba agütsüogo.

April 20, 2021 nü Ratabari, Sonai aser Haflong constituency nung re-poll asütsü.

Polling station temji, Ratabari constituency nung Indira MV School, Sonai constituency nung Madhya Dhanehari LP School aser Haflong constituency nung Khotlir LP School o Mualdam LP School lir.

April 1, 2021 nü Assam Assembly election shilem tanabuba nung constituency asem nung polling agia liasü.

April 20 anepdang 7:00 ako

nungi nikongdang 6:00 tashi polling centre pezü nung re-poll asütsü.

No 149 Indira MV School nung EVM nung tim mesüi kongshiba osang liasü. Iba polling station indang EVM ji polling officer aser tanga polling ketdangsurtem amenba Bolero gari ka nungi ngutet.

Iba gariji BJP Patharkandi MLA Krishnendu Paul indang kinungtsü tenüng nung register süa liasü.

Indira MV School nung presiding officer den tanga ketdangsurtem mapa nungi anentsüogo. Iba ken o ya CID-i bushisüngdang.

Külén, Madhya Dhanehari LP School nung polling asüdag

Assam Police pungu injang khaloktsüdag nisung asem yiru.

Injang khaloktsüba police temji Assam Legislative Assembly nung deputy speaker Aminul Haque Laskar anükertem liasü. Laskar ya Sonai constituency nungi BJP candidate lir.

Iba tatalokba atema bushisüngdang asütsü tuyuogo aser police pungu mapa nungi anentsüogo.

Külem, Khotlir LP School nung vote enoktsür nisung 90 dang ta electoral roll nungbo lir saka iba polling station nung nisung 181-i votes enoktsü.

Iba jagi presiding officer aser tanga polling ketdangsurtem mapa nungi anentsüogo.

Benpuln Semchir Telongjem-i medical camp katsü



Government Middle School, Kumlong Ward, Mokokchung nung April 10, 2021 nü angadi medical camp ka ayongzüka katsüba sülen doctor, health worker aser iba sentong ayonger, Benpuln Semchir Telongjem nungi züngsemtem külemi tangokba noksa ka yangi angur.

Dimapur, Rongchii/April 10 (TYO): Küm 25 ajungba anogomung bilemteta Benpuln Semchir Telongjem (BST) ajanga Government Middle School, Kumlong nung angadi medical camp ka April 10, 2021 nü ayongzüka katsü, kong arishi küm asem tanur nungi arishi küm 85 tain tashi Kumlong aser Mongsenbai ward tem nungi arua angadi temang repranga mozü agia liasü.

Iba angadi medical camp ya Urban Primary Health Centre, Yimyu Ward nungi Dr Imlyatet Ozukum aser par teloki agi aser parnok den yaritepa Dental specialist Dr Funitchiba, MD Dr Alemba, Optometric Assistant Sangyula nungeri tepu aser tenük amala anepalua liasü.

Ajidang masü CMO, Mokokchung kübok Mobile ICTC (Integrated Counseling and Testing Centre), RNTCP (Revised National TB Control

Programme) aser NVBDCP (National Vector Borne Disease Control Programme) nungi nurse aser technician temi shirangertem azü tendanga liasü. Manemertem temang reprangba sülen angadi mozü agütsü aser shiranger karbo mozüki dangai yoka liasü.

COVID-19 tashidak menatsü tetsüpu agi temang reprangtsü moteti aliba mapang iba medical camp ya nüburtem asoshi maongka tajung ka liasü. Mokokchung jila tezülen asü nung, Kumlong aser Mongsenbai ward nung aliba nüburtemi BST dang kanga nüngdaka aliba medical camp ayongzüksüba asoshi pelaba lemsatapa liasü.

Anogo tepiyong iba health camp agiba sülen Benpuln Semchir Telongjem tenüng nung Nungsang Jamir-i jembiba mapang medical team ajanga iba ama teyari tulu agütsüba asoshi pelaba lemsatapa liasü. Medical team tenüng nung

UPHC Yimyu Ward nungi Sentirenla Longchar-i jembiba mapang, health camp nung parnok indang service agiba asoshi Benpuln Semchir Telongjem aser nüburtem dang pelaba lemsatap. Tarutsü anogotem nunga nüngdakba mapang yariteptsü renema lir, ta laisa ashi.

Benpuln Semchir Telongjem ya Ungma nungi aser Mokokchung jila kübok Kumlong ward nung mezüng arua alir asür Benpuln Jamir'er semchirtem tentetba lir. Iba tentet yagi ward nung kisüng masü aser danga nunga maparen balala nung shilem tajung agia arur.

Ajidang masü, BST yagi küm shia Asür Benpuln tenüng nung volley ball trophy ka Kumlong ward nung Christmas aser New Year tsüngta nung ayongzüka alir. BST pur küm 25 benjongmung ya December 2021 nung ang tembangtsü.

Security Forces temi NSCN züngsemtem apu



Dimapur, Rongchii/April 10 (TYO): Security Forces temi Police den lungjemer general area Diphupar, Dimapur nung April 6, 2021 nü operation ka agiba mapang NSCN (U) züngsem ka pua liasü.

Osang tejangja kar nung ajemdaker sepaitemi mita aoba mapang NSCN (U) züngsem ka ya apu aser pa ket nungi point 22 pistol ka aser injang pongu nguteta liasü.

Iba ken o maneni bushisüngdangtsü asoshi pua

alisang den pa ket nungi ngutetba oset tem Diphupar Police Station, Dimapur nem agütsüogo, ta sangdong ka ajanga ashi.

Maneni Security Forces aser Police lungjemer April 6, 2021 nü Tirap District, Arunachal Pradesh kübok general area Thinchha nung operation ka agiba mapang NSCN (R) nungi züngsem ana den OGW ana pua liasü.

Osang tejangja kar nung ajemdaker mita bushiba mapang

NSCN (R) züngsem pezü ya apu aser parnok ket nungi M-16 Rifle ka den magazine, HK series Rifle ka den magazine, point 32 pistol ana den magazine, 5.56mm indang injang 147, Chinese Hand Grenade ka den detonator, point 32 indang injang ana, sen 2310 aser danga osettsüset nguteta liasü.

Pua alirtem den parnok ket nungi ngutetba hadirtem ya maneni asüngdangyatsü atema Khonsa Police Station, Tirap nem agütsüogo.

CPOtatong tir Vehushu Madeo asükhulemsateper

Dimapur, Rongchii/April 10 (TYO): Tanep NHAK, Kohima nung CPO tatong tir Vehushu Madeo asüba asoshi ni aser Naga People's Front (NPF) ajanga mangyim tejashi den asükhulemsateper, ta NPF tir, Dr. Shürhozelie Liezietsu-i sangdong ka nung ashi.

Pa ya regionalist meimba nübu ka, shibai party nung jenjang balala nung tenzüka arua liasü. Pa ya Working President Phek Division inyakdang tang Phek

Division indang Advisor inyaka liasü.

Asür Vehushu-i party temaba jenjangi ajungkettsü asoshi bendanga agüja inyakba aser shilem agibatem ajak molungjang nung teti alitsü, ta sangdong nung shia lir.

Pa asüba atema NPF party mang ayimer aser mangyimer kibong den asükhulemsateper aser Tulusang Tsüngremi parnok nem tesunep aser anisüngzük agüjang ta sarasademtsür, ta paisa ashi.

Nagaland BJP ST Morcha ajanga Neiba Konyak tushia agizük



Naiba Konyak den BJP ketdangsürtem Honibarnü Kohima nung tangokba noksa ka yangi angur.

Kohima, Rongchii/April 10 (TYO): State tenüng nung ST Morcha atema national executive züngsem nung shimokba asoshi Naiba Konya nem tenüngsang agütsüba sentong ka Bharatiya Janata Party (BJP) Schedule Tribe (ST) Morcha, Nagaland state unit ajanga Honibarnü head office, Kohima nung ayongzüka agia liasü.

ST Morcha, BJP Nagaland general secretary Kruto Tetseo-i sangdong ka ajanga ashiba agi, Naiba Konya-i iba sentong nung jembiba mapang pa dak tamang kateta national level tashi ajungketba asoshi

BJP Nagaland tir aser Minister Temjen Imna Along dang pelaba shia liasü.

Paisa Nagaland state asoshi süoki ia bilemstüba aser state nung terenlok bener arutsüba asohi Ato Kilonser Narendra Modi aser BJP national president, JP Nadda dang pelaba shisem.

Iba sentong nung adener pela agizükba o ya state general secretary aser ST Morcha Nagaland in-charge-i jembiba aser tepela ankep ya ST Morcha Secretary Limatushi ajaga jembiba liasü. Iba sentong nung pa dak tamang kateta national level tashi ajungketba asoshi

National Lok Adalat-i state nung ken o 110 temangtsü



Dimapur, Rongchii/April 10 (TYO): State nung Honibarnü National Lok Adalat agia ken o 363 aliba nungi 110 tatembang kuma jembiba liasü, kong sen 1,18,52,562 jenjang ken o jembiba tembangogo.

Tanüngba linük ajunga den külemi Legal Service Institutions ajanga state nunga National Lok Adalat (people's court) agidang District Headquarters nung District Legal Services Authorities (DLSAs) temi Lok Adalat Sitting bench ter tenteta liasü.

Honibarnü National Lok Adalat atema ken o 363 shimtet aser item ya timba bank Recovery, Criminal

Compoundable cases & Motor Accident Cases Tribunal amala ken o tatem kati maruteti aliba aser ken o jembiba metenzük alibattem liasü.

Iba mapang ken o 110 dang tatem kuma jembibeta liasü. Ken o kar nungbo sen 1,18,52,562 indanga liasü.

Iba Settlement Amount nungya senchi achiba sen, Bank dang sen apua aliba meyipa menokba sen, money suits, compensation agütsüba sen dena lir.

Iba sentong ya Dimapur, Kohima, Longleng, Kiphire, Mokokchung, Mon, Wokha, Phek, Peren aser Zunheboto nung agia liasü.

Pradyot-i aniba TIPRA Motha-i TTAADC election nung takok nguogo



Tripura Tribal Areas Autonomous District Council (TTAADC) election agiba vote azüngba mapang neburtem kima sendena ataba noksa nung angur.

Agartala, April 10 (Agencies): Tripura chuba jabaso Pradyot Kishore Manikya Debbarma-i aniba TIPRA Motha-i Tripura Tribal Areas Autonomous District Council (TTAADC) election nung takok nguogo.

TTAADC election nung Tpirasa Indigenous Progressive Regional Alliance (TIPRA)-i menden 23 nungi toktepbani nungi 16 nung takok angu aser parnok den yariteper Indigenous Nationalist Party of Twipra (INPT)-i menden 18 nung takok angu.

Menden 28 atema election nung Bharatiya Janata Party (BJP)-i menden 14 nung toktepbani aser 9 nung takok angu.

Ajisüaka, parnok den yariteper Indigenous Peoples Party of Tripura (IPPT)-ibo menden ka nung danga takok mengutet.

Left Front-ia menden 28 prong nung toktepbani saka menden ka nung danga takok mangu.

Congress-ia kasa tiaji ajuruogo. Taküm TTAADC election nung Independent candidate kati takok angu aser paji Gandachara Ganga Nagar constituency nungi Bhumika Nanda Reag lir.

TTAADC nung menden ajak agi 30 lir saka April 6 nü menden 28 atema dang election agia liasü.

May 2015 nung taoba ADC election agidang CPIM-i aniba Left Front-i menden 25 nung

takok ngua council ketdangsüa liasü.

ADC election agitsü ita ana dang lia chuba jabaso Pradyot Kishore Manikya Debbarma-i TIPRA kümteta liasü.

Tesüiba küm 15 tashi Tripura ADC ya Left Front-i dang ketdangsüa aruogo.

Maharaja Pradyot Kishore Debbarma ajanga dang takok ngutetogo, ta TIPRA Motha general secretary Animesh Debbarma-i ashi.

TTAADC nung taoba CEM aser CPI(M) lennir Radha Charan Debbarma-i ashiba agi, "nübortemi BJP aser IPFT dang tejashi sayu saka iba tejashi indang tajangzük mengutet."

Mizoram nung class 8 aser teküpok atema school shibangtsü

Aizawl, April 10 (Agencies): Mizoram sorkari Honibarnü Class 8 aser teküpok kaketshirtem atema school shibangtsü tetuyuba agütsüogo.

Mizoram nung COVID-19 kanga putetba nung ajemdaker sorkari iba tetuyuba agütsüogo.

Class 8 aser teküpok class tem atema online class dang agitsü. Ajisüaka, class 9 nungi 12 tashi tatidangbo maneni agitsü, ta sorkari metetdaksü.

May 4 nungi academic session 21-22 atema school tem lapoktsü metetdakja liasü saka ibaji sota atar, ta sorkarisa ashi.

Iba ya Central Board of Secondary Education (CBSE) board dena school ajak atema lir, ta parnoki ashi.

Mizoram nung COVID-19 ajema akümiba agi March 1 nungi Class 5 nungi 8 tashi aser iba sülen April 1 nungi Class 3 aser 4 atema school lapoka liasü.

Hokolbarnü Mizoram nung nisung 25 dak Covid-19 aliba putet aser parnok züngsema nisung ajak agi 4,583 kümogo.

Mizoram nung nisung 4,457 taneptsü nguogo aser tang 115 anepaludar. Mizoram nungsa COVID-19 puteter nisung 11 süogo.

Honibar nungi benshitsu özüng agütsüba nung aonung sentep malitsü aser district headquarters ajak nung aonung 8:30 ako nungi curfew alitsü metetdaksüogo.

Taoba mapang hopta nung anaben aonung sentep agitsü temelaba agüja liasü aser district headquarters ajak nung aonung 10:00 ako nungi anepdang 4:00 ako tashi night curfew liasü.

Sentep nung mesüra tanga lokti adenshidak kentenba kecha malitsü ta state sorkarisa tetuyuba agütsüogo.



Meghalaya Energy Corporation Limited (MeECL)-i Umngot ayong nung power 210 megawatts adoktsü atema tünoktang ka yanglutsüba anema noktakerlemi lenmang mokdang lungkak aitba angur. Meghalaya State Pollution Control Board-i East Khasi Hills district kübok Siangkhnai yimdak sentong ka aser ano West Jaintia Hills district kübok Moosakhia yimdak sentong ka agitsüba liasü saka lungkak aiterlemi lenmang mokdangba ajanga additional district magistrate-i anir ketdangsürtem senden alidaki moutet.

Assam nung lisopur Muslim nunger census agitsü

Guwahati, April 10 (Agencies): Assam nung lisopur Muslim nungertemi parnok indang NRC balaka renemtsü telemtetba agiogo.

Parnok Assam nung lisopurtem ta maitsü jangjaa sayutsü atema April 15 nungi iba mapa tenzüksü.

"Assam nung lisopur Muslim aser tangalen nungi aruba Muslim nunger bendangtsü atema 'census' agitsübaji kanga nüngdaker" ta Janagosthiya Samannay Parishad chief convenor, Mominul Awal-i ashi.

Assam nung kin pezü-Goriya, Moriya, Deshi aser Julha-i "Assamese Muslims" ta ser census agitsüba osang metetdaksü.

April 15 ya Assamese Year indang mezüng anogo lir anungji tongtipang anogo ka ta züngshir. Iba anogo ya Rongali Bihu benjung den külemi amonger.

Assamese Muslim nungertemi portal ka nung nüngdakba kulikaket ajak agütsütsü. April 15 nungi tenzükera ita asem agütsütsü aser kulikakettem jangjaba sülen draft nung zülüoktsü.

"Goriya, Moriya, Deshi nunger ya Assam nung lisopur Muslim kintem lir saka tamangba yimsü kasa asüba agi tenüng mesüktepa lir. Iba jagi Assam nung lisopur Muslim nunger aser tanga linüktem nungi aruba Muslim nunger tsüngda tepila balaka mali" ta Awal-i ashi.

Tangalen nungi aruba Muslim nunger telok kati Assam nung Muslim nunger

ajak ka dang akümtsü atema mapa tenzükogo aser iba tasa ya inyaker, ta paisa metetdaksü.

"Saka, lisopur Muslim nunger maitsü balaka lir aser ibaji Ahom chubatem aser Bir Chilarai (Koch Royal Dynasty) nungeri agütsüba lir" ta Awal-isa ashi.

Lisopur Muslim nungertemi Ahom nunger den külem Mughal nunger den raraogo aser nüjiso atema raraba nunga shilem agiogo, ta paisa shisem.

Assam state indang nütsüng yongsük nung Muslim nunger 34.22% lir. Assam nung lisopur Muslim nunger lakh 40 shi lir, ta Awal-isa metetdaksü.

"Lisopur Muslim kintemi Miya nunger (tangalen nungi aruba Bengali-oshi jembir Muslim nunger) den meyoktepbaji tesasatsüka lir. Maitsü jangjatsü atema onoki census agitsü" ta paisa ashi.

"Küm 1200 tejaklen Goriya nunger yangi aru, parnok Ahom nunger aküm. Moriya nungertemji hadir yanglutsü atema parnok madak yimsü asürtemi anir aru. Desi nunger ya Koch-lisopur Muslim kintem lir saka tamangba yimsü kasa asüba agi tenüng mesüktepa lir. Iba jagi Assam nung lisopur Muslim nunger aser tanga linüktem nungi aruba Muslim nunger tsüngda tepila balaka mali" ta Awal-i ashi.

Tangalen nungi aruba Muslim nunger telok kati Mominul Awal-isa metetdaksü.

AR-i Rs 1,05,600 alang foreign beer apu



Aizawl, April 10 (Agencies): 23 Sector Assam Rifles indang Serchhip Battalion-i Mizoram kübok Chhungtein nung foreign beer case 22 puogo.

Hokolbarnü Assam Rifles jawan aser state excise & narcotics department ketdangsürtem külemi Chhungtein nung mita aodang beer ji apu.

Iba dak sendakba nung

excise & narcotics ketdangsürtemi nisung ka pua lir. Parnoki yashi apuba beer indang jengjangji Rs 1,05,600 shi asütsü akok ta asadangtetogo.

Assam Rifles jawan temisa Aizawl nung nisung ana ket nungi Rs 36,000 alang beer apu.

AR sepaitemi foreign beer den külemi foreign cigarettes 5000 packets aser Rs 42 lakh jengjang heroin apu.



TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 11, 2021

Nisung masü Kibuba tenzüker

Asenok shiba südir sang, alima nung taküm ali tashi mapa kabosa inyaka alitsü, anungji koba mapa inyakdir inyakang, iba mapaji nisung asoshi masü saka Kibuba Tsüngrem asoshi inyaker ama inyakang ta tenyar Paul-i Kolosi yimti nung alir alar aser kiburtem dang ashiba asenoki Kolosi tapu 3 nung angur. Iba kasaji tanü tendak asenok dang ashir ama asenoki agizüka inyakra, ibaji asenok asoshi temoatsü aser tepela angudak tzüpokdak amato asütsü. Atangji, kechi mapa inyakdir inyakaka, Tsüngrem meteta aser memeteti inyakba na tsüngda talangka ittepa lir. Kodang asenoki Tsüngrem masü nisung tenzüker ama inyakdir, kecha agia asenok tenük masüngtsü aser kibur alidang mesüra kiburi meimba yari dang asenoki inyaktsü. Aji oda, mapa shitak aser topur junga inyaker asü meinyaker ta bilema masü saka sen kwi angur aser kechi agütsür (?) ta asüba tsütsü dang bilema inyaktsü. Iba shisatsü dener inyaker temi pei mapa nung kodanga tepela mangutsü aser mapa ka nunga tejok majet, ka nung khen inyakdangli aser ano ka nunga khen inyakdangli ta tesüsabo teinyakdak maka aser chiyongtsüa maka ta kümadoktsü. Ashiko, Filemon den alisang par alar Onesima-a iba ama nisung ka liasü asütsüa akok. Iba jagiang pa Filemon'er kidang melitet jena ao südi. Ajisüaka, ajak tia ajung Paul ajurua pa temulung meyip aser akhidang Filemon'er kidang aliba alar Onesima to masü saka tanaben asoba taküm tasen Onesima aküm. Iba kuli nungji ajemdaker, Paul-i Kolosi nung alir kilirtem dangi "nenoki kechisa inyakdir, aji nisung dang masü saka Kibuba asoshi inyaker amato bilema temulung ajak agi inyakang," ta Kolosi 3:24 nungji angur. Atangji, alar aser kilir asoshi dang masü saka kiburtem dang parnok ajak madak kotak nung Kibuba ka lir ta meteta inyaktsü asoshi Paul-isa Kolosi 4:1 nung shia aliba asenoki angur. Alima nung nisung taküm ka asoshi tezüdangtsü tulutibaji mapa meinyaknüseti inyakba ya lir. Ano külen, nisung ka asoshi jangratemtsü tulutibaji, kechi mapa inyakdir inyakaka pelashishia inyaknüseta inyakba ya asütsü. Aji oda, Khristan taküm ka asoshi kechi mapa inyakdir inyakaka, iba mapaji Tsüngremi moatsü ta bilema, "kechisa inyakdir, Kibuba Yisu tenüng nung tebu Tsüngrem tenüngsanga inyakang," ta kasa Kolosi 3: 17 nung shia angutsü. Kidang asütsüa akok mesüra mapa inyakdak tanga nung asütsüa akok, kechi mapa inyakdir inyaka Tsüngremi moatsü, anungji Pa asoshi ta bilema inyakba o nisung asoshi inyaktsür ta bilema inyakba na tetsüngda talangka alitsü. Aji oda, kodangsa asenoki inyakba mapaji Tsüngremi moatsü ta angateta inyakdir, asenoki sarasadema inyaker aser kodang asenoki sarasadema inyaker, iba mapaji asenok asoshi Tsüngrem külemdak tesem tajung ka amai kümadoktsür. Iba jagi Mahatma Gandhi-ia "Mapa ya tekülemba" (Work is Worship) ta ashiba asenoki jembir. Iba tangatetba nung kodang asenoki nisung tenzüker amato masü saka Tsüngrem tenzüker amato inyakdir, ashiko, mapa kiburji nisung tamajung asütsüa akok mesüra mapa inyakdak tekolakba jagi kecha balaka asen mapa agi tenük sünga mejembitsüa akok, ajisüaka Laishibaisa ashir, kodang asenoki pei mapa nung Tsüngrem pelatsüsa inyakdir, "Kibuba nungi senmang akümtsüsa tajangzük angutsü," Kolosi 3:23. Aji kodang bilemdangdir temoatsü tulu lir, kechiyong alima nung asenoki inyakba mapatem aser aseni bendenba rongsentem aika senmang makümer saka asen tenük agi ngua tanü kar asüba to asüng maka akümer. Ajisüaka, Laishibai ashir, kechi mapa inyakdir inyakaka, nisung asoshi masü saka Tsüngrem asoshi inyaker ama inyakba nungi anguba temoatsü aser rongsenjibo senmang akümtsü. Aseni inyakba nung nisung nungibo sempet (award/reward) kecha mangutsüa akok, saka kodang asenoki asen mapaji asen tekülemdak kümer hopta piyong Tsüngrem tenüngsanga inyakdir, Mathi 6:4 nung Yisui ashiba ama, asen Tsüngremi senmang küma amangtsüsa jakdaka moatsütsü.

OLEMSABANG

Kaket züluba nükjidong aser Arogo kimung

~ Wati Longchar (Serampore)

(Yashi adok nungi...)

Ashiba ama fundamentalist telok tentet aser tashiyim amshir yimden yimsüsüri kijai züluba kaket ban süa aruba otsü aika dang lir, saka iba jagi kijaji tai taa mangatetsüla; aser khen khenbo telokjiang tai süa atar. Tat. agi., Roman Catholic arogoi Copernicus-i züluba kaket. On the Revolutions of Celestial Spheres, alimai anü meküta alonger ta züluba ban sütsü aser pa arogo nung endok, saka küm 400 lia arur külenang, Copernicus-i ashiba to shitak ta nangzük. Kasaji Martin Luther-i Roman Catholic-i inyakba anema 95 theses zülü aser ajitai ta aija pa Catholic arogo nung endok, saka pai zülubaji shitak ta tanübo Catholic arogoi agizüker. Yamaji Ao lima nunga Chungliyimti nungi masü, saka South East Asia len nungi Aor, Naga nunger jakzüka aru shilu ta ashiba senchi achiba otsü lir, saka tanübo lung trok nungi poktet ta shingaa meshitet. Sources shitak amshia scientific research agia züluba kakettem kodanga menokdangtsüla aser senchi machitsüla kechiba süra iba jaki lokti shisatsü ainba nokdang. Kechi source amshia kaket kaji zülü aser shiba shitak aser shiba tai aji kaket zülur, shisashir aser tarutsü scholar khuret südaksütsüla.

Tetsü-tebou tebang o agi shia yutsüba, teka agi züluba yutsüba (diary/journal) aser scholartemi kaket balala nung ajemdaker tejangja scientific research agir yutsüba ajakji otsü züluba nung kanga tongtibang. Item ajakji medemdanga otsü azüngtsüla aser zülutsüla. Arogo nung record balala, magazine balala ya tang aser tarutsü otsü zülur asoshi kanga tongtibang anungji kanga junga rizünga ayutsüla. Junga rizünga ayuba ajanga William Carey-i küm 200 tejangdang pa tekai zülua yutsüba tanü tashi Carey Museum, Serampore College nung yua lir. Martin Luther-i 95 theses küm 500 tejaklen teka agi zülubatam tanü tashi Heidelberg University achieve nung yua lir. Yamaji tejen document teka agi zülubatam tanü tashi archive aika nung angutsü. Tanü putu nung tekai zülua yutsüba documentji otsü bushiba nung tongtibangtiba source ta züngshir, aser ibaji dangji original source, iba dakji alema tanga tejangja authentic source mali ta agizüker. Anungji asen lima arogo aser kechi telok tentet nung südir süang, magazine, record, talisa teka agi zülua alibatemi kanga junga aser kümdanga rizünga ayutsüla.

Lokti tentet ajaki jubilee telok tentetba anogo nung ajemdaker amonger. Akhidang zülü nung junga mayuba, tebang o agi dang shitepa aruba, mesüra zülua ayuba samadokba/raksadokba ajanga anogo mejangjai akümer. Asen lima nung ama, alima aika nung anogo balala ashishitepa ajanga aser küm aser anogo nung ajemdaker jubilee benjongmung mungdi ta asüba agi tebenja aika adoker. Otsü zülur balalai tejen journal/dairy nung tekai zülua ngutetba aser yangji anogo balaka, ita balaka, küm balaka ngutetba ajanga arogo kimung raksatsür ta mangatetsüla. Otsürajemer aikati ashi ama (Dr. F.S Downs-i ashiba mamar) arogo tenzüka kimungji küm aser anogo nung amendaker tenzüka mali, aser metenzüktsüla, saka Yisu Khrista Osangtajung agizükba dak ajemdaker arogoi tenzüker. Simon Peteri Yisu dang, "Na taküm Tsüngrem Chir Khristaji lir" ta nangzük aser iba kimong tamang nungji Yisui kü arogo yangertsü ta ashiba ama, Osangtajung aruba ajanga kin ka Khristan kümogo aser iba Osangtajung ajanga temelenshi tulu bener arutsüogo ta asübaji tongtibangtiba lir. Osangtajung agizükba nung tongtibangtiba ta ashiba nungji historical fact (küm aser anogo) nungdak mali ta mangatetsüla aser kokra tejangja anogo, ita, küm tejangja ayutsübaji tim, saka research balala bushiloka aotsübaji tarutsü lanur researcher asoshi lemang sadem sadema lapoka yutsütsüla. Kechi telok südir süang iba telemtetba aser tangatetba dak alema tanga research kecha magizüktsü ta asüba dangji "academic silencing" ta ajar. Iba tangatetbaji kenyonji tai lir. Kerala nung Yisu nütsüng Toma-i AD 52 metaarua arogo tenzüksü ta asüba dak alaka anogo aser küm tejangja mali, saka tanü tashi tamanger telok lir ta asübaji tongtibang. China nung AD 69 shi Yisu nütsüng ka aruasayutsüngi ta otsü nungbo jembir, saka tamanger telok maliba agi iba otsüji nungdak mali akümer, aser tongtibang ta mezüngshir. Ao limai American Baptist Missionary mezüngbuba Dekahaimongi tua Osangtajung sayu aser arogo tenzüka ajanga Aor/Naga nunger tenük lapoktsüogo ta asübaji tongtibang lir, aser ibaji Ao arogo kuli. Tejen Lai nung küm 50 bubu shia Jubilee amung. Iba jubilee anogo mesüra ita tataklet ka nung amungba masü, saka küm piyong amung. William Carey India-i aruba küm 200 ajungba jubilee 2018 küm piyong sendong balala agia ao. Jubilee takok ngua amungba aser telemtetba, aser nükla tasen nung Serampore College bener aotsü lemtetbaji tongtibangtiba lir. Akhidang missionary ajakibo diary mayu aser kar asoshibo ayutsü nungdak mali asü. Asen limanung dang masü, Asia nung arogoitem aika nung arogo tenzüka küm aser anogo atsütepba otsü aika zünga arur. Saka Osangtajung aruba kümji metetterbo mapang mashika nung Jubilee amungba aika nung angur. Yisu koba küm, anogo nung aso memetet, saka arogoi 25 December anogo Christmas ta munga arur. Otsü zülur kari Clark 1872 December 18, kari 22, kari 23 ta zülua angu. Ano tarutsü nungbo lanur karibo anogo balaka shitetsü shibai metet, saka iba jagi arogo kimungji manokshir, aser aji maksü ka masü. Taoba mapang koba anogo nung, koma munga aru yamaji maneni amungtsüla. Arogo yendi telemtetbaji tongtibangtiba lir ta angatetdi. Clark-i Naga nunger baptisüba anogoji atangji arogo tenzüka anogo, saka iba anogoji dang temeshi amai, aser jubilee amungtsü atema kodanga melenshitsü makokba anogo ka amai mebilemstüla. Iba anogo nungji dang jubilee amongtsüla aser iba anogo nungji amung nung dang temoatsü angur amai mebilemstüla. Arogo yendi kechi anogo ajak asoshi tapet asütsü ta tajungtiba lemteter iba anogo nungji sarasadema foundation day aser jubilee mungra temoatsü asütsü.

Iba kaket, Tanü Putu Khristan Tamang Lenisüba nung ocet metsü (20) lemsateper. "Tanü" ta süaka arogo kar nungbo mapettsü akok. Alima melenshia aor asü nung tezülurtemi kechia lemsatepogo itemji küm ishia tsüngda nung mapettsüa akok. Iba kaket nung kechi shisatsü lemsatepogo itemji metongshia agitsü, temelenshitsü sayuteptsü, shisatsü tajungtemji angazüktepa mapa küma inyaktsü nükla nung iba kaket adoktsür. Tsüngremi tazünger ajak temoatsü angutsü imlar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

32buba Angami Catholic Youth Association (ACYA) mongdang agidar



NAPO conference hall, Chiephobozou nung 32buba Angami Catholic Youth Association (ACYA) convention tetenzük sentong nung (abelen nungi) Zenikho-o Benedict, Rev. Fr Vemedo Joseph Kezo, Vikepelhou Lucas Meyase aser Fr John S Kavav nung tangokba noksa nung angur. ACYA convention ya "In your patient endurance, you will gain your soul" omen nung ajemdaker agiogo.

Kohima, April 10 (TYO): Department nung Director, Hokolbar (April 09, 2021) nungi tenzüka Chiephobozou nung aliba NAPO conference hall nung 32buba Angami Catholic Youth Association (ACYA) convention tetenzükogo; "In your patient endurance, you will gain your soul" omen nung ajemdaker agiba conference ya Amongnü tembangtsü, ta ACYA Publicity Committee nungi Medolenuo Ambrocia-i sangdong ka ajanga metetdaksü.

St. Dominic Savio Arogo nung ACYA spiritual Director, Rev. Fr. Vemedo Joseph Kezo-i wako salaja anogo asemnü conference ya tenzüka liasü, iba sülen ACYA naklo ken tasenba aten.

Angami nung yim 59 nungi tejaokertem adenba mongdang nung tetushi tejaokerji taoba mapang School Education

Department nung Director, Vikepelhou Lucas Meyase liasü aser pa tongti o jembir liasü.

Omen nung ajemdaker jembidang Lucas Meyase-i lanurtem dang Yisu Khrista tesayubatem benshitsü ajungshia liasü.

Paisa amangbapurtem dang kati ka dang tai tokteptsü aser tangar dang tatishitsü tajung sayua taküm tajung alitsü ayongzük.

Paisa lanurtem dang pei tamang jenjang nungi khenyongi masetshitsü aser Tsüngrem O amanga tashi angaa alitsü ayongzük.

Kasa sentong nung jembidang Catholic Association of Nagaland (CAN) Tir, Johnny Ruangmei-i lanurtem dang ACYA tentetba nukjidong pei taküm ajanga sayutsü ajungshi.

Pai lanurtem dang, tang

mapang ya tasü itta mangdang ayutsü mapang, tesüiba mapangtem meypa reprangshitsü aser tarutsü atema nukla tajung yur inyaksü mapang ka lir, ta ashi.

"Lanurtem kabu nung tashi tulu lir", ta shia pai lanurtem dang pei tamang jenjang tashi itshitsü atema technology amshitsü ajungshi.

Angami kin nungi nübur aika Catholic Khristantem lir, ta shia pai ACYA dang, lanurtem ajak asoshi milen sayurtem kaka asütsü ayongzük.

Sentong nung Catholic Youth Association (CYA) Chiephobozou-i ken ka aten, Catechist Christ the King Church Kohima, Ruokuovituo Robert-i sentong tembanga liasü.

Sentong tetenzüklen ACYA Tir, Zeneikho-o Benedict-i lokti pelaa agizükba o jembia liasü.

India tesem ajaklen anti-conversion ozüing benoktsü mepishiba SC-i magizük

April 10, 2021: India linük tesem ajaklen anti-conversion ozüing benoktsü atema temepishiba ken o ka agütsü, ajisüaka India nung tematiba court- Supreme Court-i magizük.

April 9, 2021 nü Supreme Court-i, peii melungba tamangba yimsü amangtsü atema linük nung arrshi küm 18 ser temapurtem nem temeden agüja lir, ta shia linük tesem ajaklen anti-conversion ozüing benoktsü mepishiba magizük.

Supreme Court lawyer aser BJP züngsem, Ashwini Upadhyay-i public interest litigation (PIL) ka ajanga Supreme Court nem iba temepishiba agüja liasü.

Justices- R.F. Nariman, B.R. Gavai aser Hrishikesh Roy nungeri akümba bench-i iba temepishibaji magizük, aser temepishiba ken o agütsür dang iba temepishiba meypa agiang, ta metetdaksü.

Iba temepishiba ken o angadanga mapang nung SC bench nungi züngsem asemi, linük temzüng kübok tamangba yimsü mashie shimtsü atema arrshi küm 18 ser temapur

senso ajak nem temeden agüja lir, anungji tamangba yimsü melenba anema ozüing ka benokra ibaji linük temzüng anema asütsü, ta metetdaksü.

Temepishiba ken o benoksang atema counsel, senior advocate Gopal Sankaranarayanan-i iba ken o meypa agitsü saka sorkar den law commission ajurutsü, ta ashi.

Ajisüaka law commission ajurutsü atema bench-i temelaba magütsü.

Supreme Court obendangi Catholic Khristantemi kanga pelaa agizükogo. Taoba mapang Catholic Bishops' Conference of India nung otongdar, putir Bapu Joseph-i, iba obendangi linük temzüng den tapet, kechiyong linük temzüng ajanga tamangba yimsü shimtsü,

proktsü aser benshitsü atema senso ajak nem temeden agütsür, ta ashi.

"Linük temzüng nung agüja aliba 'religious freedom' anema state aikati anti-conversion ozüing agizükogo aser iba ya ajanga minorities, talisa Khristantem kongshir," ta pai ashi.

Paisa, iba obendang ya mapang tetemsü ka nung agütsüogo, kechiyong Hindu teloktemi tamangba yimsü meypba nokdangtsü atema linük tesem ajaklen ozüing ka benokner, iba denji külemi Khristan missionary temi ashikülak ajanga Dalit nung aser tribal nisungtem Khristan yimsü dangi meypdaksür ta tai tonglokja arur, ta ashi.

Tang India nung state 8 nung tamangba yimsü meypba nokdangtsü atema anti-conversion ozüingtem benoka lir, aser item ozüing nung ajemdaker Hindu yimsü alia amangertemi Muslim nung aser Khristantem anema inyaker.

ANOGO ABEN TSÜNGREM DEN

AIN ADOKBA MALI

"Saka ni ijip lima nungi Kibuba ne Tsüngrem lir. Parnok atsüngzüka aoba ni aneptsütsü, ni parnok angati dang meimtsü; kechiyong kü ain adokba pa dang nungi meypa ogo." Hosea 14:4

Asen Tsüngrem taochi agi sünga aliba Tsüngrem. Pai asenok odang meim, pai asenok taochi agütsüa tatok agütsüba taküm ka lir. Israel otsüji dang masü saka tanü na aser ni temenen nisung, tamanger süaka kibuba ajungbai ama taküm meliteter aser mesayuteter. Asen tashi mait khen bilemdangdi anema toktsü sür nung tekülem-i arua Pa külemtsü makoker. Saka asen nungdakbo koma ka mazüngaka inyaker. Asen nungdak aginüadang oh Kibuba ta ajar saka züba- züba dang pelarako ta Tsüngrem dang mashir. Tila ka dangji, mesüra yabo kecha masü ta dang temenen inyaket dang inyaka jajaba khristanten aika lir. Aseni inyakba yaribo atakatem aser temerenshi aru langa lir. Pai asenok ajak aneptsütsü asen tashi mait Kibuba dangi bendi arung.

SARASADEM

Kibuba nai onok odang meim nung pelar, Nai ni agizükangma, ni ne dangi arur. Amen

Teen Missions International tentetsang, Robert Bland süogo



Robert Bland (File photo)

April 10, 2021: Teen Missions International tentetsang, Robert Bland süogo; pa arrshi küm 92 liasü, ta Christianity Today osang ajanga metetdaksü.

Missionary organization kati parnok den mapa inyaksü atema arrshi küm 14 tetsür ka indang application magizükba Bland-i metetba sülen 1970 küm pai Teen Missions International ya tenzüka liasü.

Teen Missions International nung teens (arrshi küm 13-19 tsüingdapurtem) nem "boot camp" training agütsür, iba training mapang nung alima tesem balala aser tensa balala nung litettsü atema teens nem tesayuba agütsür. Tang tashi nung iba organization yagi lanur (teens) missionary 42,000 dak tema alima tesem balalai yokogo.

Bland-i Teen Missions International metenzükdang küm 10 tejaklen (1960) pa indang ministry bo tenzüka liasü. Phoenix nung aliba Arizona Bible College nung graduate asüba sülen pai pa indang ministry ya tenzüka liasü.

Pa Alma, Ohio-i meypa oa Jay Lee Stelle aser American

Sunday School Union atema inyaka liasü. Pa bus agi yangluba ki ka nung tesem balala sema ali aser pa den par kibongi bus nungji Southern Ohio yimtsüngtem aika sema vacation Bible school ayongzüka agia aru.

Iba sülen pa Youth for Christ International nung training agi aser Mt. Joy Arogo nunga pastor inyaka liasü.

Pa leniba nung Teen Missions-i tanurtem Florida nung aliba aremi anir oa kiojen balala asütsü atema sayua liasü. United States aser Canada nungi tanur jenti Florida aremi anir oa Lord's Boot Camp nung training agidakja alima tesem balala nung mission hospitals, orphanages, airstrips aser medical rescue units amenoktsü atema tesayuba agüja liasü.

Iba ministry yagi Africa nung medical rescue units aika amenok aser lajar tanur aika nem tsüingsem agütsüba den lanur tetsürtem atema matron units yanglutsü.

Bland aser pa kinungtsü naprongla süadokogo, ajisüaka tena chir asembo taküm lir.

OLONG PAITEP # 5778

	1		2			3		4		5
6								7		
					8		9			
			10							
11										
			12							
13		14		15						16
17								18		

TIPILEN		LANGTSÜNGLEN	
1. Inyaker ajangtetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Reprangzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashiochtsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

OLONG PAITEP # 5777 TELANGZÜBA

TIPILEN :		LANGTSÜNGLEN :	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kiochtsü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. teronem,	
14. Ola, 16. Talak, 17. Mazük.		12. Sempa, 13. Jahaz.	



ALOKBA O KINUNGTSÜ NA KIYIM LANUR SEMINAR KANUNG ADEN

Warakla : Ayaa...Narola tebu... tanü o jembir-i kinungbur ka itasen kidangi bener marur. Aonung shia yi agi meseper kinungtsü o tanürtem merenshir... Apok-attsü agibo matu ser tetsüng-teben agi tu-tua mesura ta ashiba-to...Ajibo ozü tambu indang otsü ashir-a ta bilema menogo.

Alokba : Waao...Narola tetsü.... Ano kinungtsür ka kidang mamen anepdang anepongi ayazüka aoba nikongdang-ang kidangi shilanger...Tanür school senshir kidangi arudang ...kidang melidanger.... Tanür dang lesson sayutsübo aonung pongmang ta ashiba-to... Ajibo ozü tantsüla indang otsü ashir-a ta bilema menogo.

Narola : Ajia-to...Nenabo aji azü-i azü dak asanger amai dang ado...??? Anungji nena-ta tang 'Seminar' nung adenba tajangzük melenshiangma.

Lilir : L.Kika Pongener.

TANÜBO NAI LANGZÜANG

Q. Chenab Bridge tasazük ___ talang lir.
 A.1315m B.1400m C.1415m D.1500m


(Taruba adok nung onoki langzüsü)

YASHI ADOK TELANGZÜBA : 1987

AO OSHI ANGAZÜKDAK:
TANÜ ANGAZÜKTSÜBA OJANG


Bangja
 (adj.) O tali jembiba (talkative)
 * La kanga **bangja** aüba agi ajaki alaker

Bangka
 (v.) Anünglen tayimtsü aoba ngua onok kanga **bangka**



Happy Birthday

TENÜNG : LEMTETSANG LEMTUR
 Tasoba anogo : April 11
 Küm : 3
 Talidak : ICIT Campus Ungma, Mokokchung
 Tsüngremi jabaso Lemtetsang nem arrshi maneni moaja küm 3 ajungba anogo nung Tsüngrem nem tenüngsang agütsür. Tsüngremi maneni jabaso nem arrshi anogo tajung moajang ta sarasademer.



-Oja, Oba, Odi & kinüngterem

NAI-A YA METETTER MA?

- APRIL 11 NÜ ASOR TONGTIBANG NISUNG KAR:**
- American statesman & orator Edward Everett (1794)
 - U.S. Supreme Court Chief Justice Charles Evans Hughes (1862)
 - Jyotirao Phule (1827)
 - Kasturba Gandhi (1868)
 - Fashion designer Oleg Cassini (1913)
 - Actor Joel Grey (1932)
 - Actor Louise Lasser (1939)
 - Actor Peter Riegert (1947)
 - Actor Meshach Taylor (1947)
 - Pulitzer Prize-winning columnist Ellen Goodman (1941)
 - TV personality Jeremy Clarkson (1960)
 - Actor Matt Ryan (1981)
 - Actor Will Tudor (1987)
 - Singer Joss Stone (1987)
 - Actor Dakota Blue Richards (1995)

SUDOKU # 5821 TELANGZÜBA # 5820

1	4	2		9				5	5	9	8	1	4	6	3	2	7	
7			4					8	9	6	2	3	8	5	7	9	4	1
8		5						2	4	4	7	1	2	9	3	8	6	5
2				4	8					1	5	6	4	2	8	7	9	3
	3			1	2	6				8	4	2	3	7	9	1	5	6
	8			7	2	9	4	1		7	3	9	6	1	5	4	8	2
	5		2	6						9	1	4	5	3	2	6	7	8
	2	8		9	4	1				2	6	7	9	8	1	5	3	4
	7	9	1	8	5	3				3	8	5	7	6	4	2	1	9

OJANG LUTEP # 5365

RATE :

ANDG :

IRCH :

POKTE :

ÜNGDMASANG :

IBONUNG :

AKEINYR :

OKTEP :

NGSÜA :

IANCHG :

OJANG LUTEP TELANGZÜBA # 5364

TELOK NUNG AIBELENA INYAKBA MAPAREN MEIMBANGA AYÜTSÜ KHENYONGI DANG TAMAKOKTSÜ

TAN HOPTA ATEMA - KOMA SÜLA ?

Q. Tang Nagaland nung government medical doctor-temi akangba ama, parnok kisüng atema, parnok govt mapa nungi anentsü asoshi tasoba küm 60 aliba nungi 65 kümtsü nunga koma süla ?

Bengal election anogo nung Cooch Behar nung nisung 5 khaset



April 10, 2021 nü West Bengal nung Assembly Election shilem pezübuba agiba mapang Cooch Behar district nung rara adokba sülen yirurtem yariba noksa nung angur.

Kolkata, April 10 (Agencies): West Bengal nung assembly election mapang Cooch Behar nungbo tesüiba anogo ishika tensa tamajungba kümдар, aser Honibarnü election shilem pezübuba agidang iba district nung rara tuluka adoka nisung pongu khasetogo.

Honibarnü mezüing Sitalkuchi Assembly constituency nung arrshi küm 18 voter, Ananda Barman polling station ka anasa khaset. Par kibong züngsemtemji BJP pusemertem lir, ta ashir saka TMC-ia paji TMC pusemer ka liasü, ta shiogo.

Iba tatalokba sülen ghonda ishika dang lir kasa constituency nungsa polling station ka kima Central paramilitary sepaitemi injang khaloktsüdang nisung pezü khaset.

CISF sepaitemi injang khaloktsüba ajanga asürtemji Hamidul Haque, Haminul Haque, Manirul Haque aser Noor Alam nunger lir, ta jangjaogo.

TMC nungi Sitalkuchi menden nung candidate aser Cooch Behar district unit nung TMC Tir, Partha Pratim Roy-i, "Central sepaitemi kecha masü nung injang khaloktsü. Parnoki BJP den senteper inyaker. Ozü voters tsüburdaktsür jenshidaktsüsü atema injang yok," ta aitsü.

Cooch Behar district administration-i, injang khaloktsürtemji Central Industrial Security Force (CISF) sepaitem lir, ta

metetdaksüogo. Dinhata Assembly menden nungi toktepsang aser Cooch Behar nungi BJP Lok Sabha MP, Nishith Pramanik-ibo, "Trinamool Congress (TMC)-i sepaitem jashidaktsüsüsa inyak. Chief minister-i central sepaitem anema inyaktsü atema lar party pusemertem ajungshir," ta aitsü.

Ano külen tanü tatalokba dak sendakba nung TMC tongti lenir aser chief minister, Mamata Banerjee-i Union Home Minister, Amit Shah-i menden nungi alutsüla, ta takhangba agütsüogo.

North 24 Parganas kübok Badurai nung election sentong ka nung jembidang Mamata-i, iba sentong tembangba sülen la Cooch Behar-i oa sepaitemi injang yokba tesem semdangtsü, ta metetdaksü.

Mamata-isa, nisungtem vote agütsüsü atema tarensena nokdaka lia Central police-i injang yok, menüngdakba nung nisung khasetogo, anungji Amit Shah-i minister menden nungi alutsüla, ta takhangba agütsü.

Laisa, Amongnü TMC-i state tesem ajaklen longkak aittsü, ta shia party nung inyakerem dang 'badge' tanak khaloker nikongdang 2:00 ako nungi 4:00 ako tashi longkak aitba nung shilem agitsü mepishia metetdaksü.

"BJP-i tamakok angutsü ta meteta nisung tepsetsü atema asalentong yanglur," ta laisa shisem.

District administration-i ashiba agi, nisung kari sepaitem

indang prangpong rakzüksü tebilemba aliba meteta sepaitemi injang khaloktsü, ta ashi.

Election Commission of India (ECI)-i iba tatalokba indang report tejangja agüjang ta district ketdangsertem dang tuyuogo.

Tesüiba hopta ka jungnüa iba district nung tensa mejungi lir. Bodhbarnüa TMC züngsemtemi BJP state unit Tir, Dilip Ghosh amak ta tai tonglokja liasü.

Brihostibar aonunga TMC nungi Mathabhanga candidate, Girindranath Barman-a BJP pusemertemi amak ta tai tonglokja liasü. Kasa anogo nungjisa bomb ka apokba lendong nung arrshi küm 14 tebur ka yirua liasü.

2017 küm nungi West Bengal nung rara adokba tesem tamajungbaji Cooch Behar lir, aser ibaji mezüingbi TMC telung nung raratepba ajanga liasü, saka 2018 küm panchayat elections agiba sülen nungibo iba district nung TMC aser BJP na tsüingda raratepa arur.

2019 küm TMC nungi jendoksang youth wing lenir, Nishith Pramanik-i BJP nung adenba sülen Cooch Behar menden nung takok ngua liasü.

District nung alirtemi ashiba agi, district nung assembly 9 nungi TMC pur Sitalkuchi aser Sitai na nung jenjang junga lir aser Tufanganj o Mekliganj na nungbo BJP o TMC na kasa jenjang nung lir. Tanüingba menden pongu nungjibo BJP jenjang tajungba lir.

Sorkari tangar nem vaccine agütsür saka India nungbo anünger: Sonia

New Delhi, Rongchii/April 10 (Agencies): Tang linük nung coronavirus kanga prokba dak sendakba nung Honibarnü Congress Tir, Sonia Gandhi-i Congress-i yimsüsüba state tem nungi chief minister tem den senden ka menogo.

Video conferencing ajanga amenba senden nungji chief minister tem den jembidang Sonia Gandhi-i, tongtibangtibaji tendangtsüla, contact trace asütsüla aser vaccine agitsüla, ta ashi.

Senden tembangba sülen Congress otongdar, Randeep Surjewala-i, Sonia-isa coronavirus wara anema raraba jenjang asadanga liasü, item rongnung vaccine, mozü aser ventilators agi anüingba densema lir, ta metetdaksü.

Osang angazükba agi, kasa senden nungji taoba mapang Congress Tir, Rahul Gandhi, Rajasthan chief minister Ashok Gehlot, Punjab chief minister Amarinder Singh aser Chhattisgarh chief minister, Bhupesh Baghel nungeria shilem agia liasü.

Vaccine mapatong dak sendakba nung Centre aija Sonia-i, "Modi-i iba tensa junga mazüokteter. Parnoki bendangleni vaccines yokba ajanga India nungbo vaccine agi anünger," ta ashi.

Laisa, coronavirus case timba-timba akümer, anungji lokti sentong aser election nüboyim sentong ajak thinenttsüla, ta ashi.

Party otongdar Surjewala-i, iba wara agi sensakertem tamajungba kongshiba atema Rahul Gandhi-i tebilemstü akaba lemsatapa liasü, ta ashi.

Anogo ana tejaklen Congress lenir Rahul Gandhi-i shidi ka ajanga Ato kilonser Modi dang lintük nung vaccine nüngdaker ajak nem vaccine agütsüsüla, aser tanga linüktem dangi vaccine yokba tangsa anentsüla, ta mepishia liasü.

Tang India kübok Maharashtra, Odisha, Andhra Pradesh, Punjab, Rajasthan, Uttar Pradesh, Uttarakhand, Chhattisgarh aser Bihar state tem nung covid vaccine agi kanga anünger.



New Delhi, April 10, 2021: Anjali Rai-i AAP nung adenba sülen Honibarnü New Delhi nung osangbenertem senden ka nung AAP lenir, Raghav Chadha (ajichi)-i la pelaa agizükba noksa nung angur.

Covid telatetbatem mebenshira election rally nokdangtsü: EC

New Delhi, April 10 (Agencies): Linük nung coronavirus tashidak kanga prokba mapang nung Election Commission (EC)-i assembly election atema nübo ayimertem aser yimtenren party balala nungi lenirtem dang mask magiba atema tekümdangtsü metetdakja, yaküm latetba Covid telatetbatem mebenshira election nüboyim sentongtem nokdangtsü, ta metetdaksüogo.

Hokolbarnü shidi ajanga yimtenren party ajak dang Election Commission-i, "Tesüiba hopta ishika tsüingda coronavirus tashidak kanga prokba ajaki meteta lir. Ajisüaka election sentongtem aser nüboyim sentongtem nung nisung o nisung na tsüingda tetsüingda itta maliba, mask magiba aser commission tetuyubatem mebenshira osang onoki angazükogo," ta metetdaksü.

Kasa shidi ajangasa, covid telatetba mebenshii nüboyim sentong nung shilem agir aser candidate temi sabang nung mask magir, aser ibaji ajanga yimtenren party tem aser

election sentong nung adenertem rongnung tashidak prokshitsü, ta metetdaksü.

"COVID telatetbatem mebenshira Election Commission (EC)-i lokti senden nokdangtsü, tashi mangar candidate tem, nüboyim nung shilem agirtem aser yimtenren lenirtem indang sentongtem memelatsü," ta EC-i metetdaksü.

Brihostibarnü Delhi High Court-i Election Commission aser Central sorkar dang election sentongtem nung mask magiba atema ashishia liasü.

Assam nung assembly election shilem asem lemsar agia tembangogo, Tamil Nadu, Kerala aser Puducherry nung kenüyongi election agia tembangogo aser West Bengal nungbo ano election shilem pezü tashi agitsü anünga lir.

Tesüiba ghonda 24 tsüingda India nung ano nisung 1,45,384 dak coronavirus putet aser ibaji densemabo tang tashi nung India nung nisung ajak agi 1,32,05,926 dak iba tashidak putetogo, ta Honibarneep Union Health Ministry-i metetdaksü.



April 10, 2021 nü aluyimertemi aluyimba ozüing atasen anema longkak aitdang Sonipat distrtict anasa Kundli arrtsülen KMP Expressway mokdangba noksa nung angur.

UK ajungalen Prince Philip nem akum agütsür



Prince Philip asüba temaitsü Honourable Artillery Company nungi 41-gun salutes Members temi April 10, 2021 nü Tower of London nung 41-round gun salute agütsüba mapang tangokba noksa nung angur. Britain indang Prince Philip, shiba Queen Elizabeth II kinungbo liasü, pai küm 70 dak tema pa kinungtsü yaria arur Hokulbarnü asü.

Windsor, Rongchii/April 10

(Agencies): Prince Philip asüba nungtem nung Honibarnü Britain tesem ajungalen gun salutes (asür nem akum agüja prangbong khashishiba) agütsü, shiba Queen Elizabeth-i otsü tasen yanglua yimsü asüba mapang la indang nokdang ka liasü.

Arishi küm 99 lia Hokulbarnü asüsang nem akum agüja nüburtemi chibar aliba ki kimalen naro yutsü.

Queen Elizabeth ya chubatsür menden nung küm 69 tashi mena arur.

Mitkartemi Philip asüba nungtem nung anüngdang teroto nung Death Gun Salute agütsü. London, Edinburgh, Cardiff, Belfast aser Gibraltar nung aliba artillery unit aser tzüyüm sepai indang raraba rong kar nungi prangbong kkadoka

liasü. Buckingham Palace ajanga asüpila sentong asoshi Honibarnü menur sangdongtsü imlar.

Asüpila sentong ya tilaka dang alitsü amai lir, aser COVID-19 tenokdangba mechi akhi mapang nungi chuba yimli nung amshia aruba yimya tem mamshitsü akok, aser kasaji prince-ia nüburtem nungtepba maginer.

Chubar kibong nungi nüburtem dang tashidak wara memenateptsü asoshi benokba social distancing yimyatem amshitsü aser parnok aliba ki mesemdangtsü mepishiaka nüburtemi aonung tepiyong Windsor Castle aser Buckingham Palace kima nung card aser naro yuja liasü.

"Koda jangratemtsü takum! Asen linük tenzükba asoshi

nüdang kanga pelar," ta Buckingham Palace kima zülü ka zülua liasü.

Chubatsüri la kinungbo asüba osang ya metetdaksü, shiba la molung ayudak aser tamang katetdak liasü. Tena ya kibong kumer küm 73 liasü aser June ita küm 100 ajungtsü liasü.

Alima nung lenirtemi asükhu lemsatepba mapang lir.

Philip dang ya Duke of Edinburgh ta ajar, aser pa teyari nung chuba yimli asendenshi aser pa kinungtsü nungita yaria liasü.

Chubar kibong nungi züngsem asüba temaitsü London nung aliba Westminster Abbey indang tsüngtsüng 99 ben tema liasü.

Buckingham Palace aser Britain tesem ajunga nung aliba sorkar meyong ki nung nisan tiyongtsü ka tashi atsüzüka liasü.

South Asia nung COVID-19 cases million 15 jungogo



Rongchii/April 10, 2021

(Agencies): South Asia sub-region nung coronavirus tashidak agi menepertem ya Honibarnü tashinung nisung million 15 jungogo, ta Reuters ajanga asadangteta lir, aser yangji India nung anogoshi iba tashidak talila putetba den mozü agi anüngba dena lir.

South Asia - India, Bangladesh, Pakistan, Bhutan, Nepal, Maldives aser Sri Lanka - nung iba tashidak putetba ya aliba ajunga nung puteta aliba shilem 11 lir aser nisung asüba shilem 6 shi lir. Iba region nung alima nütüsing yongsük shilem 23 lir, koba billion 7.59 lir.

South Asia nung iba tashidak putetba aser nisung asüba ya shilem 84 India nungi lir, koba

alima nung coronavirus tashidak timtiba putetba jenjang asembuba nung lir.

Alima nung nütüsing yongsük timtiba jenjang tanabuba nung aliba linük, India nung Honibarnü coronavirus cases tasen 145,384 putet, koba alima nung iba virus tekeratiba züina aoba aser tan hopta otsü tasen yangluba nung ponguben buba alitsü. Kasa anogo iba linük nung nisung 794 asüba osang lir. Nisung lokti tali nungzüba aser mask agitsü nungnangba ajanga tang iba jenjang ya atonger, ta sorkari ashir.

Tang aliba nung nisung trok dak COVID-19 putetba nungi nisung kabo India nungi alir.

Iba linük nung anogoshi nisung million 4 nem

coronavirus mozü agütsütsü meranger, saka sorkari mapang shidak nung mozü tanaben magütsüteter, ta state aika nung osang lir.

India anüolen kidanger linük, Pakistan ya region nung tamajungtiba kongshiba linük tanabuba lir, kong wave tasembuba agi kongshia cases 700,000 dak tema aser asüba 15,000 shi lir.

Iba linük nung tesüiba anogo ter tsüngta cases kanga sashia akum. Iba tashidak wara tenzükba sülen tang intensive care nung nisung timtiba lir, ta ketdangtsürtemi ashir.

India anüdoklen Bangladesh linük nunga anogoshi cases 7,000 shi puteter aser tang tashinung nisung 678,937 dak iba virus puteta lir.

India Ato Kilonser Narendra Modi-i Bangladesh nem AstraZeneca mozü doses million 1.2 agüja lir.

South Asia nung Hokulbarnü tashinung nisung million 94.1 nem COVID-19 mozü dose mezüngbuba agütsüogogo, ta Our World in Data ajanga ashir.

Osangbener tepsetba bushisüngdangtsü akhanger

Athens, Rongchii/April 10

(Agencies): Osangbener tepsetba maparen tekeratiba nung bushisüngdangtsü atema Greek Ato Kilonser Kyriakos Mitsotakis-i takhangba agütsüogogo aser iba tatalokba atema European Union ketdangtsür, political party aser media union temia aitsüogogo.

Giorgos Karaivaz, shiba juri TV station, Star nung inyaka liasü aser news blog bloko.gr lapoka ali, pa ya Hokulbarnü southern Athens nung aliba Alimos district nung mapang nungi meyipa shilangba mapang par ki kima gari nungi ayazüka aluba mapang injang agi ishíben akha, ta tenük kuli alirtemi ashir.

Arishi küm 52 tain Karaivaz dak nisung ana motorcycle nung a rur injang khaloktsü, ta police-i ashir. Iba tesem nungi injang terep 12 ngutetogogo, ta police ketdangtsür kati ashir.

Iba ken o dak sendakba nung Ato Kilonser Mitsotakis-i police minister Michalis Chrysochoidis ya Honibarnü senden amentsü jaok, ta PM office ajanga ashir.

Iba lendong ya European Commission aser Council of Europe commissioner for human rights ajanga aitsüogogo.

"Osangbener tepsetba ya aitsütsü langa lir aser tasü mait mapa ka lir," ta European Commission chief Ursula von der Leyen-i Hokulbarnü Twitter post ka nung ashir.

Karaivaz ya osang abenba wadang nung ajemoker küm 32 tashi arudang Greece indang osangkaket aser TV channel aika nung inyaka aruogo.

"Pa ya wadang nung mapa tamajung inyakba osang abener nübu tejen ka liasü... aser külem puri pa akumtsüba liasü," ta ESIEA union of Athens daily newspaper journalists ajanga sangdong ka nung ashir.

Ozüng amshirtem jenjang tajungba kumdaksütsü asoshi Karaivaz kanga jangrabangra inyaka liasü, ta federation of Greek police officers ajanga ashir.

Greek media office tem nung firebomb pokloktsüba aser office raksatsüba mapang shia ajurur, saka osangbener tepsetba aiben ataloka mali.

Amokmerenba sülen osangbener kari police tanükba meshi, saka Karaivaz anüker meliasü, kechiaser pai tanüker memeshi, ta osang ajanga ashir.



Luxor province, Egypt nung aliba küm 3,000 tain yimti ka nung nüburtem nokdaka aliba angur. Tang tesüsa ali nung totetba yimti ya Luxor nung Nile tzükum anüolen temple of King Rameses III aser colossi of Amenhotep III tsüngta nung lir. Iba yimti ya Amenhotep III'er semchir Tutankhamun, aser pa melener King Ay nati maneni amshia liasü.

Ethnic army temi Myanmar sepai ter tepset

Yangon, Rongchii/April 10

(Agencies): Myanmar nung mitkari tashiyim amshia sorkar atsüngdokba anema nokdaker dak mitkartemi tashiyim amshiba anemer ethnic army tesendaktep telok jaru Honibarnü linük anüdoklen police station ka maka police ter tepset, ta osangtem ajanga ashir.

Shan state kübok Naungmon nung aliba police station nung Arakan Army, Ta'ang National Liberation Army aser Myanmar National Democratic Alliance Army dena aliba telungjem nungi züngsemtemi anepdang züngia lia amak, ta osang ajanga ashir.

Shan News ajanga police tajemba agi 10 asü, ta ashir aser Shwe Phee Myay osang ajanga nisung 14 asü, ta ashir.

February 1 nü mitkartemi sorkar atsüngdokba anema longkak aiter dak mitkartemi tashiyim amshidang nisung 600 dak tema tepsetogogo, ta monitoring group ka ajanga ashir. Azüdokshi tali akumba mapang telungpur telok ter dak temai mitkartemi tim masüba mapa inyaker, ta aitsü aser longkak aiter den külemi nokdaksü nangzük.

Civilian özüng yanglurtem, shirnok timba menden nungi atsüngdokba sülen jenshia senzür, parnoki "national unity government" ka tentettsü sentong metetdaksüogogo, kong ethnic kin lenirtemi tongti shilem agitsü, aser mitkar anema lungjemer nokdaksü asoshi online ajanga jembishinüba mapang lir.

Realme-i smartphone tasen asem saya



New Delhi, Rongchii/April 10, 2021 (Agencies): India nung Realme-i budget smartphone asem - Realme C20, Realme C21 aser Realme C25 sayaogo. Item smartphone ya company indang C-series kübok aiter.

Smartphone asempronlga nung 6.5-inch display aser MediaTek processor inoka yanglutsüogo. Realme C20 ya entry-level smartphone ka lir, kong single rear camera aser MediaTek Helio G35 SoC angutsü. Realme C21 aser Realme C25 nung triple camera setup ka ka keta lir.

India nung phone asempronlga sen 11,000 agi angutsü aser shishilembadak smartphone yagi kasa segment nung nungtugu budget phone talisa Samsung, Xiaomi aser tanga brand den tokteptsü.

Realme C20, koba entry-level smartphone ka lir, iba smartphone nung 6.5-inch HD+ IPS display den 20:9 aspect ratio angutsü. MediaTek Helio G35 processor den 2GB RAM aser 32GB onboard storage ajanga phone maparen achaayangtsür. Memory ulua aginürtemi microSD card ka ajanga 256GB tashi atsülanga amshitetsü.

Camera atema, iba smartphone tesülen single 8-

megapixel camera den f/2.0 aperture aser LED flash inoktsüogo. Selfies aser video calling atema phone tejaklen waterdrop-style notch nung 5-megapixel shooter angutsü. Realme C20 nung battery tasazük 5,000mAh alitsü aser Micro USB port ajanga charge sütsür. Iba battery nung reverse charging feature dena lir.

Realme C20 - 2GB + 32GB option jenjang sen 6,799 alitsü aser Cool Blue o Cool Grey sentsü nung angutsü. April 13, 2021 nungi tenzüka iba smartphone ayoktsü.

Realme C21 nung 6.5-inch HD+ LCD display den 89.5 percent screen-to-body ratio dena lir. MediaTek Helio G35 SoC den 4GB RAM aser 64GB storage ajanga phone maparen achaayangtsür, koba microSD card ka ajanga memory atsülanga amshitetsü. Tesülen, triple camera system nung 13-megapixel camera den f/2.2 aperture, 2-megapixel macro camera den f/2.4 aperture aser 2-megapixel monochrome lens den f/2.4 aperture inokja lir.

Selfie tangoktsü atema, iba phone tejaklen waterdrop-style notch telung nung 5-megapixel selfie camera angutsü. Phone nung battery tasazük 5,000mAh lir. Company sangdong ajanga

angazükba agi, iba phone khen charge (standard usage) nung anogo piyong amshitetsü aser reverse charging support asür.

India nung Realme C21 - 3GB RAM jenjang sen 7,999 aser 4GB RAM jenjang sen 8,999 alitsü. April 14 nungi tenzüka iba smartphone ayoktsü.

Maneni, Realme C25 nung 6.5-inch HD+ display den 20:9 aspect ratio aser 480 nits peak brightness angutsü. Octa-core MediaTek Helio G70 chipset den ARM Mali-G52 GPU and 4GB RAM ajanga iba phone maparen achaayangtsür. Iba smartphone ya 64GB aser 128GB onboard storage option nung angutsü; aser microSD card ka ajanga memory atsülangtsü amshitetsü. Phone tesülen triple camera system ya square-shaped module ka nung inokja lir, kong 48-megapixel primary camera den f/1.8 aperture angutsü.

48-megapixel primary camera dak alaka, Realme C25 nung 2-megapixel monochrome camera den f/2.4 aperture aser 2-megapixel macro shooter dena lir. Selfies aser video calling atema, tejaklen 8-megapixel camera sensor den f/2.0 aperture angutsü. Phone nung battery tasazük 6,000mAh alitsü aser 18W fast charging support asütsü.

India nung Realme C25 - 4GB + 64GB jenjang sen 9,999 aser 4GB + 128GB option jenjang sen 10,999 alitsü. Iba smartphone April 16 nungi tenzüka ayoktsü.

Realme C20, Realme C21 aser Realme C25 smartphone ajanga Realme channel aser Flipkart ajanga angutsü.



Mulungnen O

Meimchirtem süadoker aser iba akümüli toktsür oadoker, Ajsüka aseni inyakba mapatembo bilemteter... Iba asen mulung nung alir. Rongjentsüka saka temunungratsüka lir....

Onoki teti meima aliba asür, SAKUTEMSULA, iba akümüli wadang toktsür orr onok mangyim jashi nung alidang shirnokisa temeim sayua sarasadem den rongsen aser mapa tajung agi onok nungita yariogo, nenok ajak dang kinüngertemi pelaba metetdaksür.

Nenok mapa tajungtem onok mulung taroktiba nungi pelashishia agizüker aser onok mulung nung teti alitsü.

Tsüngremi nenok ajak moajangma.

Phezoucha nung Sanitation truck tenzüksüogo



Kohima, Rongchii/April 10, 2021: Neiketouzo Kenguruse aser tangartemi Phezoucha nung sanitation truck tenzüksüba noksa nung angur.

Kohima, Rongchii/April 10, 2021 (TYO): Honibarnü, Phezoucha Rhiiba Council (PRC) Kohima kübok Nagaland's Civil secretariat junction, Kohima nung sentong ka agiba mapang Nagaland CM indang PS Neiketouzo Kenguruse-i Phezoucha atema Sanitation Truck ka tenzüksüogo, ta sangdong ajanga metetdaksü.

Phezoucha telungtet nung

nüburtem tesünap nung alitsüsa maparen junga achaayangba aser sanitary system tajung anepaluba atema Kenguruse-i PRC dang pelaba metetdaksü.

PRC chairman Dr. Ketshukietuo Dziivichii-ia sentong nung adenertem den jembia liasü.

Iba sentong tenzüka, Phezoucha Nagamese Baptist Church, sannüker Velavoyi Keyho-i sarasademtsü.

AR-i KNSK nem teyari agütsü

Dimapur, Rongchii/April 10, 2021 (TYO): Hokolbarnü (09.04.2021) HQ IGAR (North) kübok Assam Rifles indang Mokokchung Battalion-i Aboi Town indang Konyak Nyupuh Sheko Khong (KNSK), Women Organisation nem office nung amshiba osettsüsettem tenla agütsü.

Lokti nung tetsür inyakyim/ maparen tsütsü nungittsü aser parnok nungdakba peridaksütsü nükjidong nung Assam Rifles-i tenla tajung agüja liasü. Assam Rifles-i iba ama mapa tajung inyaktsüba asoshi KNSK tetsür tenteti pelaba metetdaksüogo.

Maneni, sangdong ka ajanga angazükba agi, Honibarnü (10.04.2021) HQ IGAR (North) kübok Assam

Rifles indang Mon Battalion-i Mon district kübok yimtsüng 11 nung LED Street Light 122 inoktsüogo. Sadbhavana Project shilem ama, Mon district kübok Yuching, Tangnyu, Phomching, Wetting, Longshen, Tamaichung, Wangti, L/Wamsa, Chenmoho, S/Chingnyu aser S/Wamsa yimtsüng tem nung Assam Rifles-i item LED light lema agütsü.

Item yimtsüng ya India aser Myanmar arrtsülen aliba tesemtem lir; aser item tezü tesem nung street light inoka mali. Tang ama tensa tamajungdang, nübur timtemba ajiteta teyari agütsüba asoshi lisopurtem, lokti tentet balala aser Civil Administration ajanga Mon Battalion dang pelaba metetdaksü.

AR-i Chieswema nung sentong ayongzük



Dimapur, Rongchii/April 10, 2021 (TYO): Honibarnü (10.04.2021) HQ IGAR (North) kübok Assam Rifles indang Chieswema Battalion-i ARPS Chieswema nung 'Poster Making Competition' ayongzük. Iba sentong ya "Ek Bharat Shrestha Bharat" omen nung ajemdaker ayongzüka liasü.

"Swachh Bharat Abhiyaan" mapatong nung mera tilaka agiba ajanga linük nung "Cleanness is Godliness" tsütsü nübutem angatetsü asoshi teyari agütsütsü. "Clean India Green

India" sentong nung ARPS, Chieswema nungi tsürabur 18 aser kaketshir 27 agi shilem agiogo. Iba ama sentong tajung asoshi tsürabur aser kaketshir temi Assam Rifles dang pelaba metetdaksü.

Kasa anogo, Assam Rifles indang Chieswema Battalion-isa Makharung Village, Baghty Wokha District nung Marketing Shed den toilet block lapoktsü. Iba maparen ya Assam Rifles Civic Action Project kübok inyaka liasü.

Yimtsüng nung aluyimertem pei alu/atsü nungi tsünütetba

süngolemba aser süngjanglijang tem iba Marketing Shed ajanga ayoktsü asoshi lenmang lapoktsür. Iba Marketing Shed den toilet block ya Tiameren Chang (NCS), ADC Bhandari-i semzüksü. Iba Marketing Shed lapokba sentong nung anameta aliba yimtsüng nungi GBs aser yimertem aruagi denogo. Nübur nungdakba ajiteta mapang shia lenmang balala ajanga teyari agütsüba asoshi yimertemi Assam Rifles dang pelaba metetdaksü.

Venuzo Dawhuo-i 13buba Open Naga Wrestling Championship kokogo



Kohima, Rongchii/April 10, 2021 (TYO): Kohima Local Ground nung Nagaland Wrestling Association (NWA) ajanga ayongba 13th Open Naga Wrestling Championship asayamung nung, defending Nagaland Wrestling Association champion, Venuzo Dawhuo-i takok nguogo.

Arishi kum 24 tain wrestler Dawhuo ya Phek district kubok Thenyizu yimtsung nungi Nezohu Dawhuo'er jabaso lir. Pa tar suklep 5.10 shi talang aser touzik seret 95 lir.

Iba asayamung final bout nung Dawhuo-i taoba mapang champion Dzieselatuo Keretsü madak takok angu. Keretsü ya Kohima village nungi asür, Rev Khriezuetuo'er jabaso lir.

Semi-final tetoktepba nunga, Dawhuo-i Open Naga Wrestling Championship indang defending champion Menuosetuo Yiese

tsükdaktsü. Yiese ya Kohima village nungi asür Khrielatuo Yiese'er jabaso lir. Iba asayamung nung Yiese-i tasembuba aser Kevizhakho Suokhrie-i pezübuba jenjang nung takok angu.

Iba asayamung takok anguba atema Dawhuo nem senpet sen lakh 1.70 agütsü. Kasa mapang, runners-up Keretsü-i senpet sen lakh 1.20, Yiese-i sen lakh 1 lakh aser Suokhrie-i 70,000 angu.

Mezüng, 80 Kg category tema final tetoktepba nung Dawhuo-isa Keretsu akok. Iba tetoktepba nung Yiesie-i tasembuba aser Kidima yimtsung nungi Kemese Tevo'er jabaso Atuo Tevo-i pezübuba jenjang nung koka liasü.

80 Kg category tekubok final tetoktepba nung, Kevizhakho Suokhrie-i Thenyizu yimtsung nungi Neswuyi

Kapü'er jabaso Medozho Kapü tsükdaktsü. Iba tetoktepba nung Mima yimtsung nungi Vizo Lese'er jabaso Ruokuovituo Lese-i tasembuba aser Mezoma yimtsung nungi Lhuovilie Khawakhrie'er jabaso Kekhrieuolie Khawakhrie-i pezübuba jenjang angu.

Iba telemsa nung takok angurtem nem senpet sen 50,000, runners-up nem sen 30,000; 3buba nem sen 20,000 aser pezübuba nem senpet sen 15,000 agütsü.

Maneni, tongti tesemdang ama Youth resources and Sports, Advisor Zale Neikha-i iba championship lapokja liasü. Planning & Coordination, Land Revenue and Parliamentary Affairs Minister, Neiba Kronu alaketa tejaoker ama aruagi aden aser pai takok angurtem nem sempet lema agütsü, ta sangdong ajanga metetdaktsü.

Tokyo Olympics atema Anshu o Sonam na qualify süogo



Almaty, Rongchii/April 10, 2021 (Agencies): Honibarnü Asian Olympic Qualifiers nung, India tsür wrestlers Anshu Malik aser Sonam Malik nati shilem tajung agia Tokyo Games atema qualify süogo.

Arishi kum 19 tain Anshu aser arishi kum 18 tain Sonam 18 nati junior category nungi junga asaya arur senior jenjang tongtetogo. Tetsür senior asayar takoktet Vinesh Phogat (53kg) den tenati aruya Olympics nung shilem agitsü asoshi jenjang ajanzüktetogo.

Ajaki yongya ataba Summer Games (Tokyo Olympics) nung India tsür wrestler asem agi tokteptsü terenemba lir. 2019 World Championship asayamung ajanga Tokyo Olympics atema Vinesh qualify süogo.

Tang, India nungi aruya aliba Olympics atema temsüa kümer alir wrestler tenet tashi kumogo. Tebur wrestler rongnung Bajrang Punia (65kg), Ravi Dahiya (57kg) aser Deepak Punia (86kg) dena lir. Parnoki

men's free style event nung tokteptsü.

57kg category tetoktepba nung Anshu-i amokbanger asaya aruogo. Ano külen, Sonam-ia Rio Olympic medal angur Sakshi Malik ajateta Olympics atema qouta ajanzüktet.

Tawa trial asayaba mapang, Sonam-i pezüben tashi Sakshi koka 62kg category tetoktepba nung la takoker ka ama sangdong.

Final tashi asaya aruba mapang, Anshu-i tanga tetokteper nem point ana dang agütsü aser technical superiority ajanga lai bout asempronlga koka liasü.

Tetenzüklen, Anshu-i Korea tsür Jieun Um akok. Iba sülen, Kazak tsür wrestler Emma Tissina madak takok angu aser semi final nung lai Uzbekistan tsür Shokhida Akhmedova tsükdaktsü.

Sonam-i technical superiority ajanga Taipei tsür Hsin Ping Pai makokdang, lai

China tsür Jia Long madak 5-2 agi akok.

Semifinal tetoktepba nung, la 0-6 agi Kazakhstan tsür Ayaulym Kassymova tesülen liasü, saka iba quota angutsü atema lai point tukue tashi atonga takok angu.

"Senior circuit nung shilem agitsü asoshi la dak sempet aliba sayuogo aser la iba jenjang atema renema lir ama asadangteter. Lai lenla ajunga nung takok ngua asaya aruogo. Aikati la ya ano cadet level nungang lir ta ashir, saka lai Sakshi koka aruba ajanga temaba jenjang nung asayatetsüsa la sempet agi kuli asür," ta Sonam indang coach Ajmer Malik-i ashi.

"Asaya mapang tangari la ajateta point aotsüsa aküm yongjia lai tezü metangi asayar. Sonam-i iba tashi asayatetba atema onok nüma-atanger," ta Sonepat district kubok Madina yimtsung nung Netaji Subash Chander Sports Institute achaayanger Ajmer-i ashi.

Maneni, Asian Olympic Qualifiers asayamung 50kg category tetsür tetoktepba nung India tsür Seema Bisla-i bout asempronlga nung tsükadok. Kasa mapang, 68kg category semifinalnung külem India tsür Nisha-ia quota ka angutsü temulungtetba nung 3-1 agi tejakdang ser asaya, saka tia makai Kyrgyzstan tsür Meerim Zhumanazarova-i technical superiority ajanga la tsükdaktsü.

IPL ketdangsürtem RT-PCR test report sayutsüla: BCCI

Mumbai, Rongchii/April 10, 2021 (Agencies): India nung Covid-19 tanaben adoker külen nungi Mumbai nung iba wara tensa tamajungba küma aoba asadangteta, Wakhnde Stadium kubok IPL- 2021 nung shilem agitsüpur ketdangsür ajaki RT-PCR test indang negative report sayutsü asoshi BCCI ajanga temzüng renemogo.

Iba Stadium nung asaya tenzüksü ghonda 48 lia asaya reprangtsü alir ketdangsürtemi pei pei indang Covid-19 Test osang metetdaktsüsüla.

Taoba Honibarnü, Wakhnde Stadium nung inyaker züngsem 10 dak coronavirus tashidak puteta liasü, saka parnok rongnung timbaka iba wara nungi taneptsü ngur lir. Iba sülen, kasa tesem nung mapa inyaker züngsem ana - ground-staff aser plumber dak coronavirus tashidak putet.

BCCI indang tetuyuba nung anidaka, Brehostibarnü, Mumbai Cricket Association (MCA)-i, iba Stadium nung lemzüjka aliba IPL-2021 asayatem reprangtettsü atema ketdangsür tem covid negative report alitsü asoshi Apex Council züngsem dang shiogo.

Honibarnü Wakhnde stadium nung Chennai Super Kings aser

Delhi Capitals na mezüng asayaogo. Iba stadium nung April 10 nungi 25, 2021 tsüngda match 10 asayatsü.

MCA indang Apex Council nung ketdangpur pungo densema züngsem 17 dena lir.

"BCCI indang temzüng nung renema aliba ama, Wakhnde Stadium nung IPL- 2021 asaya atema adentsü pur ketdangsür ajak asaya tenzüksü ghonda 48 lia RT-PCR test indang negative report sayutsüla," ta Brehostibarnü Apex Council züngsem dangi MCA secretary Sanjay Naik-i zülü.

"Vaccine agir alir ajak RT-PCR test agitsüla. Iba Stadium nung asaya tenzüksü lia report sayutsüla. Anungji, ketdangsür ajaki tests agitsüla aser asaya tenzüksü aliba mapang negative report metetdaktsüsüla," ta Naik-i zülü.

"Brehostibar nikongdang, Wakhnde Stadium nung anepdang 11 ako nungi nikongdang 1 ako tashi BCCI-i

RT-PCR test agitsü atema achayangtsü ta Apex Council züngsemtem dang metetdaktsü. RT-PCR test nung mulungsoa adentsüpur züngsem dang email ajanga osang agütsüshi shiogo," ta MCA otongdar sangdong ajanga metetdaktsü.

FIFA U-17 Women's World Cup director mapa nungi anener

New Delhi, Rongchii/April 10, 2021 (Agencies): Honibarnü, FIFA U-17 Women's World Cup aser AFC Women's Asian Cup (2022 kum India nung asayatsü aliba asayamung) indang Tournament Director ama Roma Khanna mapa nungi anener. Nija maparen kar ajanga Roma-i iba menden toktsür.

2019 kum Khanna-i anir U-17 World Cup atema bid sentong nung shilem agiogo aser iba sülen Local Organising Committee atema la Tournament Director ama shima liasü. Iba den külemi, AFC Women's Asian Cup, koba sangküm January ita India nung asayatsü renema lir, iba asayamung atema-a lai anir takok ngua bid nung shilem agiogo.

"Kü dak temulung lemteta maparen nungoktsüba atema AIFF aser FIFA dang pelaba metetdaktsür," ta Honibarnü Khanna-i metetdaktsü.

"India nung asayamung maparen dak sendakba nung tekolak ser inyaktsü maongka anguba ya konang ka ama lir. Local Organising Committee ajanga maparen takok ngua inyaktetba asoshi nümaatanger aser India nung tetsür football ajungkettsütsü asoshi nükla tajung lemsatepba asoshi team danga pelar. India nung football aser tetsür saispang tsütsü 2022 kum ya tongtibang asütsü aser iba asayamung nung India tetsür team takok ngua shilem agiba reprangtsü asoshi yongyar," ta lai ashi.

AIFF general secretary Kushal Das-i, India football

wadang tsütsü terenlok alitsü asoshi Roma-i bendanga agiija inyakogo.

"Küm ter tashi AIFF den Roma longjemer inyaka aruogo aser linük nung football asaya tsütsü terenlok lidaktsütsü atema lai meranga inyakogo. Tekolak ka ama Indian football tsütsü Roma-i shilem tulu agiba asoshi AIFF aser football nung sendaktepa alir ajak tenüng nung la dang pelaba metetdaktsür," ta Das-i ashi.

"ILeague nung club licensing system amenokba, 2017 kum FIFA U-17 World Cup asayamung mapang yimti trok kubok asaya tesemtem achayangba den women's football tournament ana atema bid takok sentong nung takok ngua shilem agiba aser National Centre of Excellence mapatong amenokba tsütsü lai shilem tuluka agiogo," ta Das-i lemsatep.

"...Lai iba mapa toktsütsü lemtetba osang angazüka onok mepelar, saka la tebilembatem onoki angateter aser tarutsü nunga la wadang nung takok tajung lidakjangma," ta Das-i shisem.

Mezüngbo, India nung 2020 edition tetsür World Cup asayamung ya November 2 nung 21 tashi ayongzüksü renem, saka Covid-19 tensa mejungi akümba asadangteta iba asayamung anogo atsilangtsü aser 2022 kum ang iba asayamung asayatsü FIFA-i sangdong.

Roma Khanna melen Tournament Director tasen ka shimtsü asoshi AIFF-i FIFA den longjemer inyakdar.

BILEMDANGANG
"Timtem arema inyakba jagi tarutsü nung na anisüngzük angutsü."